



KEMENTERIAN WILAYAH PERSEKUTUAN

Blok 2, Menara Seri Wilayah, Presint 2, 62100 Putrajaya Tel: 03-8889 7888 Faks: 03-8889 7957
Laman web: www.kwp.gov.my

SIARAN MEDIA

UNTUK LIPUTAN MEDIA MASSA

PLATFORM PRIMA DAKWAH WILAYAHKU MENAUTKAN SILATURRAHIM SESAMA SAUDARA MUSLIM

KUALA LUMPUR, 2 Januari 2020 – Sambutan Hari Wilayah Persekutuan 2020 diimarahkan dengan anjuran Prima Dakwah Wilayahku peringkat Kuala Lumpur yang disempurnakan oleh YB Tuan Haji Khalid bin Abdul Samad, Menteri Wilayah Persekutuan di Stadium Bola Sepak Kuala Lumpur malam ini.

Kementerian telah menganjurkan program ilmiah dengan jemputan khas penceramah nusantara, Al-Fadhil Ustaz Dr. Abdul Somad ini sejajar dengan tema sambutan Sayangi Wilayahku yang mengajak warga Wilayah Persekutuan berkumpul dalam menjalinkan perpaduan dan silaturrahim. Program dakwah ini adalah inisiatif bersama Pertubuhan Dai Kuala Lumpur, Kementerian Wilayah Persekutuan (KWP) dan Dewan Bandaraya Kuala Lumpur (DBKL).

Dengan tema ‘Mahabbah Rasulullah SAW Pemangkin Keharmonian Wilayah Persekutuan’, warga Kuala Lumpur dipupuk untuk sentiasa mengutamakan sikap toleransi dan bersatu padu dengan semua pihak walaupun berlainan bangsa dan agama. Sikap ini amat penting dalam mencari solusi dan penyelesaian dalam kehidupan masyarakat majmuk di Malaysia serta memacu kesejahteraan komuniti Kuala Lumpur.

Selain itu, program Prima Dakwah Wilayahku dapat meningkatkan ilmu pengetahuan warga kota khususnya untuk kaum Muslim dalam isu-isu berkaitan agama. Kementerian menasarkankan program dakwah ini sebagai satu platform untuk memperkasakan ukhuwah sesama saudara Islam serta dapat membantu pihak kerajaan dalam melestarikan Ahli Sunnah Wal Jamaah sebagai aliran arus perdana ummah untuk menghadapi cabaran pada masa kini.

Kementerian juga menetapkan program dakwah kontemporari ini sebagai medium mengajak warga kota bersama-sama berkumpul bagi meraikan sambutan Hari Wilayah Persekutuan 2020 melalui konsep Islamik. Warga Kuala Lumpur dihiburkan juga dengan hiburan Islamik melalui bacaan maulid dan alunan qasidah pada malam ini.

Disediakan Oleh:

**Bahagian Komunikasi Korporat
Kementerian Wilayah Persekutuan
2 Januari 2020**